

VENDIM
Nr.123, datë 25.11.2011

**PËR DISA SHITESA DHE NDRYSHIME NË RREGULLAT E ALOKIMIT TË
KAPACITETEVE TË INTERKONJEKSIONEVE**

Në mbështetje të nenit 9 të ligjit nr.9072, datë 22.5.2003 “Për sektorin e energjisë elektrike”, të ndryshuar, kapitullit 11 të “Rregullave të alokimit të kapaciteteve të interkonjeksioneve”, miratuar me vendimin nr.13, datë 22.2.2011 të Bordit të Komisionerëve të ERE-s dhe nenit 26 të “Rregullave të praktikës dhe procedurave të ERE-s”, miratuar me vendimin nr.21, datë 18.3.2009 të Bordit të Komisionerëve të ERE-s, Bordi i Komisionerëve të ERE-s, në mbledhjen e tij të datës 25.11.2011, pasi shqyrtoi shkresat e shoqërisë OST sh.a., nr.2033 Prot., datë 25.7.2011 dhe nr.2110 Prot., datë 29.7.2011, shkresat e KESH sh.a., dhe “CEZ shpërndarje” sh.a., përkatësisht me nr.3923 Prot., datë 17.8.2011 dhe nr. 4151/1, Prot. datë, 18.8.2011, dhe shkresat e AEES nr.28, datë 5.9.2011 dhe nr.27, datë 31.8.2011, në lidhje me rregullat “Për alokimin e kapaciteteve të interkonjeksioneve”, si dhe relacionin e Drejtorisë Juridike dhe të Mbrojtjes së Konsumatorit dhe Drejtorisë së Licencimit dhe Monitorimit të Tregut,

konstaton se:

- Për kërkesën e OST sh.a., për të rishikuar “Rregullat e alokimit të kapaciteteve të interkonjeksionit” për shkak të pamundësisë së kryerjes së ankandeve ditore për alokimin e të drejtës së përdorimit të kapacitetit disponibël të interkonjeksionit, për shkak të mosdisponimit të platformës elektronike (Softin) për menaxhimin e tregut, Bordi i Komisionerëve vëren se periudha kohore në të cilën mbahet ankandit ditor është shumë e shkurtër nga ora 13:51 deri në orën 14:30, si të tillë problemi kryesor qëndron në mungesën e softit të OST sh.a., për të kryer këto ankande.

- Për kërkesat e KESH sh.a. dhe “CEZ shpërndarje” sh.a., përkatësisht me nr.3923 Prot., datë 17.8.2011 dhe nr.4151/1, Prot., datë 18.8.2011, për rishikimin e rregullave “Për alokimin e kapaciteteve të interkonjeksioneve”, me qëllim zgjatjen e periudhës transitore deri në 31.12.2012, bazuar në argumentimet si më poshtë:

Argumentime të “CEZ shpërndarje” sh.a.:

- Sigurimi i detyrimit të shpërndarësit të energjisë për të importuar lirshëm energjinë elektrike për humbjet në maksimumin e garantuar të kapaciteteve të interkonjeksionit pa asnjë kosto shtesë.

- “CEZ shpërndarje” ka hapur tenderin vjetor me të drejta të siguruara dhe mendon se heqja e kësaj të drejte mund të çojë në rritjen e çmimit të blerjes së energjisë elektrike dhe për pasojë do të çonte në anulimin e tenderit.

- “CEZ shpërndarje” konsideron si risk dhe mundet që nga kompanitë pjesëmarrëse në ankandin e kapaciteteve të blejnë ato dhe të bllokojnë pjesëmarrësit e tjerë të mundshëm fitues.

Kërkesa e KESH sh.a. bazohet në ndryshimet që kanë ndodhur nga koha e miratimit të “Rregullave të alokimit të kapaciteteve të interkonjeksionit” e deri më tani dhe konkretisht sipas KESH sh.a.:

- Koha kur u miratuan rregullat, i korrespondonte një cikli të mirë hidrik, ndërkohë tani ka nisur një cikël i thatë hidrik.

- Eksperiencia e deritanishme e prokurimeve të KESH sh.a., ka treguar se ka më shumë konkurrencë kur ofrohet me të drejta të siguruara nga KESH sh.a.

Në lidhje me këto argumente të “CEZ shpërndarje” apo të KESH sh.a., theksojmë se “Rregullat e alokimit të kapaciteteve” janë miratuar më datë 22.2.2011, dhe nuk ka kuptim që “CEZ shpërndarje” të hapë tenderin me të drejta të siguruara, kur prej kohësh është në dijeni të mospasjes së këtyre të drejtave pas datës 31.12.2011. Përsa i përket riskut potencial të bllokimit të kapaciteteve nga pjesëmarrës të tjerë, sqarojmë së “CEZ shpërndarje” sikurse çdo pjesëmarrës i

tregut, përfshirë edhe KESH sh.a., është i lirë të marrë pjesë në këto ankande dhe të sigurojë kështu kapacitetet e nevojshme. Po ashtu, lidhur me këtë shqetësim të bllokimit të kapaciteteve, në rregullore është parashikuar në kapitullin VII paragrafi 4, se e drejta e përdorimit të kapacitetit ndërkufitar ekzekutohet në bazë të principit “përdore ose humbe”. Dhe më tej në paragrafin 7, përcaktohet se në rast se zotëruesi nuk e përdor kapacitetin e deklaruar tek OST, atëherë ai nuk do të lejohet të marrë pjesë në ankandin e muajit pasardhës. Në paragrafin 8 përcaktohet se në rast se zotëruesi i kapacitetit në mënyrë sistematike nuk e përdor kapacitetin e deklaruar tek OST, atëherë ai nuk do të lejohet të marrë pjesë në ankandet e 6 muajve pasardhës. Nga ana tjetër, nëse do të pranoheshin argumentet e KESH sh.a., apo edhe “CEZ shpërndarje”, do të thotë që këto të drejta të siguruara të aplikohen gjithmonë dhe jo për periudha tranzitore.

Për gjithë sa më sipër, Bordi i Komisionerëve

VENDOSI:

1. Në “Rregullat e alokimit të kapaciteteve të interkonjeksioneve”, të miratuara me vendimin nr.13, datë 22.2.2011, bëhet ndryshimi si më poshtë:

1.1 Në fund të paragrafit të katërt të kapitullit I “Hyrje dhe dispozita të përgjithshme” të “Rregullave të alokimit të kapaciteteve të interkonjeksionit, shtohet paragrafi me përmbajtjen:

“Në lidhje me ankandin ditor të alokimit të kapaciteteve të interkonjeksionit nga secili drejtim, shoqëria OST sh.a., në mungesë të platformës elektronike (softit), por jo më vonë se data 31 mars 2012, do të ofrojë kapacitete ditore për të gjithë pjesëmarrësit e tregut në mënyrë proporcionale sipas kërkesave. Menjëherë pas sigurimit të platformës elektronike (softit), gjatë periudhës tranzitore, OST sh.a. duhet të njoftojë ERE-n”. OST të parashikojë në planin e investimeve për vitin 2012 fondin për realizimin e prokurimit dhe vendosjes në punë të softit brenda afatit të vendosur në këtë dispozitë.

2. Duke filluar nga data 1 janar 2012 shfuqizohen të gjitha të drejtat e rezervuara. OST nuk mund të bëjë alokim kapacitetesh mbi baza prioritare (të drejta të siguruara).

3. Për një periudhë tranzitore, por jo më vonë se data 1 korrik 2012, OST do të alokojë kapacitetet mbi bazën e ankandit mujor. Jo më vonë se data 1 korrik 2012, OST do të ketë kryer ankandin për periudhën e mbetur të vitit 2012. Për periudhën që nga data 1 janar 2013, OST do të kryejë ankande vjetore për alokimin e kapaciteteve të interkonjeksioneve.

4. Drejtoria Juridike dhe e Mbrojtjes së Konsumatorit të njoftojë shoqërinë OST sh.a., KESH sh.a., “CEZ shpërndarje” sh.a. dhe AEES për vendimin e Bordit të Komisionerëve.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Sokol Ramadani